

Naqqiut

UKA 2018/44-imut akissuteqaat 18. oktober 2018-imeersoq taarserpaa (Siunnersuuteqartup piffissanik allassimasunik naqqiinerata kiisalu UKA 2018-ip nalaani inatsisissatut siunnersuummut tamatuma tungaanut akuerineqareersumut innersuussutit kingunerisaannik)

INI A/S-ip, Illuut A/S-ip kiisalu Namminersorlutik Oqartussat illuutaannik aallaqqaataasunik akiliutigineqartartut kattunneqarnissaat pillugu Naalakkersuisut UPA2020-mut pilersaarusoqullugit peqquneqarnissaannik Inatsisartut aalajangiiffissaattut siunnersuut.

(Inatsisartuni ilaasortaq Aqqaluaq B. Egede, Inuit Ataqatigiit)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisut sinnerlugit Inatsisartuni ilaasortaq Aqqaluaq B. Egede Inuit Ataqatigiinneersoq aalajangiiffigisassatut siunnersuuteqarneranut qutsavigerusuppara.

Tassunga tunngatillugu ilisimatitsissutigineqarsinnaavoq, INI A/S aqutsiviummat, Namminersorlutik Oqartussat kommunillu inissiaataannik aqutsisuusoq. Taamaattumik inissiat tamarmik INI A/S-imit aqunneqartut ingerlatseqatigiiffimmit pigineqanngillat. Kisiannili Illuut A/S inissianik nammineerluni pigisaqarpoq, inissianik aqutsineq Agerskov A/S-imit isumagineqarluni.

Tamatuma saniatigut ukiuni kingullerni Naalakkersuisut Namminersorlutik Oqartussat inissiaataannik kommuninut tunniussinissamut aningaasanut inatsisit aqqutigalugit isumaqatiginninniarnissamut Inatsisartunit piginnaatinneqarput. Tamatumani pisortat inissiaataasa kommuninut katersuunneqarnissaat siunertarineqarpoq. Taamaalluni suliasaqarfimmi marloqiusamik aqutsineq pinngitsoortinniarlugu pitsannguiniartoqarpoq pisariillisaasoqarlunilu.

2017-imi ukiakkut piginneqatigiilluni inissiat pillugit Inatsisartut inatsisaat aamma illuliortiternernut aningaasalersuisarneq pillugu Inatsisartut inatsisaat akuerineqarput. Kiisalu aamma 2018-imi ukiakkut ataatsimiinnermi sanaqateqarluni illulianut taarsigassarsititsisarneq pillugu Inatsisartut inatsisissaattut siunnersuut akuerineqarpoq. Inissianuttooq tapersii-sarnermi taarsigassarsititsisarneq pillugu Inatsisartut inatsisissaattut siunnersuummik, tassungalu atatillugu illuliortiternermut aningaasalersuineq pillugu Inatsisartut inatsisaata allanngortinneqarnissaanut siunnersuummik UKA2019-imut saqqummiussinissaq sulissutigineqarpoq. Taamatuttooq Namminersorlutik Oqartussat inissiaataasa kommuninut tunniunneqarnissaanut piareersaataasut siumut ingerlapput, tassungalu attartortitsisarnermut inatsisissamut nutaamut tunngaviusussanik inassuteqaatinillu suliat ilaatinneqarput.

Namminersorlutik Oqartussat inissiaataasa kommuninut tunniunneqarnissaa ineqarnerup siunissami ilusissaanut inassuteqaatinik aamma imaqaasaaq, taakkunungalu ilanngullugu INI A/S-ip piginnittoqarnissaanut siunnersuuteqartussaavoq inassuteqaateqartussaallunilu, kiisalu

Illuut A/S-ip inissiaataanik kommunimut tunniussisoqassanersoq inassuteqaateqartoqartussaalluni.

Matuma siuliani allassimasut ineqarnermut suliaasaqarfimmi iluarsaaqqinnermut annertunerusumut ilaatillugu pissapput.

Suliaq ineqarnerup siunissami iluserisinnaasaanik aallussinermik imaqarmat, maanna INI A/S-ip aamma Illuut A/S-ip kattunneqarnissaannik siunnersuuteqarnissaq naapertuutinngilaq. Kiisalu isummernissamut ineqarnerup ilusissaanut nassuiaammik siunnersuummillu ataatsimoortumik saqqummiussisoqarnissaa utaqqineqartariaqarpoq.

Ilisimatitsissutigineqarsinnaavoq, ullumikkut attartortitsinermi isertitat 21%-iisa missaat aningaasaatinut iluanaarutitut tutsinneqartarmata, 68%-iisa missaat ingerlatsinermut aserfallatsaaliuinernullu tutsinneqartarmata aammalu 11%-iisa missaat INI A/S-ip aqutsineranut akiliutinut tutsinneqartarlutik. Namminersorlutik Oqartussat najugaqarfiutaanni 2018-imut missingersuutini pilersaarutaasumik piffissalikkamillu aserfallatsaaliuineranut (PPV) illuartitat 51,2 mio. koruunit missaanniipput. Tassunga tunngatillugu 2017-imi kiassarnermut immikkoortortaqarfimmi 26,9 mio. koruunit Namminersorlutik Oqartussat kiassaateqarfiinut immikkoortinneqarput.

Kommunit pisortat inissiaataanik attartortittakkanik tamanik piginnittunngortinneqassappata, kommunit siunissami ilusiliussassamut sulianut akuutinneqarnissaat pingaaruteqarpoq. Ullumikkut kommunit aqutsisuunissamik kissaateqarnerlutik aammalu kina suliasamik taassuminnga isumaginnittuussanersoq namminneerlutik aalajangiinissartik pisinnaatitaaffigaat. Tamatuma aamma siunissami atuunnissaa naatsorsuutigineqarpoq. Taamaattumik siunissami kommunit inissiaataanik aqutsisuusussaq tassaasariaqanngilaq INI A/S.

Tassalu kommunip nammineerluni kommunip inissiaataanik INI A/S inissiaatileqatigiiffilluunniit alla aqutsisuussanersoq aalajangertussaavaa.

Taamaattumik suliniutinik qanorluunniit ittunik aallartitsisoqannginnerani ineqarnerup siunissami ilusissaata kiisalu ineqarnermik aaqqissuusseqqinnermi pisariaqartinneqarsinnaasut aalajangersarneqarsimanissaat Naalackersuisut pingaartippaat.

Matuma siuliani taaneqartut peqqutigalugit siunnersuutip itigartinneqarnissaa Naalackersuisunit inassutigineqarpoq.